



**UPA 2014/144.1**  
**1. april 2014**  
Harald Bianco

### **Siunnersuut uunga: Atuagaateqarfiit pillugit Inatsisartut inatsisaat nr. XX, XX.XXX 2014-imeersoq**

(Ilinniartitaanermut, Ilageeqarnermut, Kultureqarnermut, Naligiissitaanermullu Naalakkersuisoq)

Siullermik Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq Inuit Ataqatigiinnit qutsavigaarput, inatsisip allanngortinneqarnissaanut siunnersuutaanut.

Nunatsinni innuttaasunit atuagaateqarfiit atorneqarnerannut ullutsinnut naleqqussaaneq, ilaatigut elektronikkikkut atortutigut ullutsinni annertusaajuarnernut atorneqaleriartuinnartumullu naleqqussaaneq tunngasoq Inuit Ataqatigiinnit iluarisimaarparput. Tamanna atuagaateqarfiit suli innuttaasunut pilerinartumik ullutsinnullu naleqquttumik neqerooruteqartalernissamut innutaasunullu saqqumilaartitsinerulernissamut aqqaassaaq.

Atuagaateqarfiit aamma tassaapput, ilinniartunit ilinniarnermut atatillugu paasissutissanik aallernermut atorluarneqartartut. Naluneqanngilaq aamma ilinniartut elektronikki annertusiartuinnartumik atugaajartoraat, taamaattumillu aamma taakkununga paasissutissanik aallersinnaaneq pisariinnerulerlunilu pilerinarnerulissaaq. Tamakku inatsisip allanngortinneqarneratigut qulakkeerneqartussaammaata Inuit Ataqatigiinnit pitsaasutut isigaavut. Eqallisaneq pitsaasutut taareerlugu, taamaattoq pioreersut ilaatigut killeqanngitsumik atorniarsinnaatitaanerup akeqanngitsumillu atorniarsinnaanerup ingerlatiinnarnerisa attatiinnarneqarnera pitsaasutut taasariaqarpoq.

Inuit Ataqatigiit pingaaruteqarluinnartutut isigaarput tappiitsut, allatulluunniit atuarsinnaanngitsut atuakkanik atorniartarfinni atuisinnaanissaat. Atuarsinnaannginneq paasissutissanik pisinnaannginnermik kinguneqassanngimmat pingaartipparput tusarnaagassannik amerlanerpaanik atuakkanik atorniartarfini peqartassasoq. Atuakkat saqqummersut digitaliseerernissaat pingaaruteqarpoq aammali atuakkanik atorniartarfiit atuarsinnaanngitsunut atortoqarnissaat pingaaruteqartutut isigaarput.

Inuit Ataqatigiinnit isumaqarpugut siunissami makku aamma eqqarsaatigisariaqartut: Naluneqanngilaq sinerissami illoqarfinni tamani kiisalu inoqarfinni

allani tamangajanni atuagaateqarfiit tamarmik atuarfinniittut. Inuit Ataqatigiinni isumaqarpugut siunissami eqqarsaatigineqartariaqartoq atuagaateqarfiit immikkut illumi inissisimasariaqartut. Taamalliornikkut ilaatigut ammasarfiit aalajangersimasut atuutilersinneqarsinnaammata, kiisalu ullutsinni nalinginnaavoq atuagaateqarfinni sulisut tamatigungajak ilinniartitsisuullutiluunniit iliniagaqaratik atuagaateqarfinnik sulisuusartut. Siunissami anguniagassat ilagisariaqarpaat atuagaateqarfilerisutut (Bibliotikar) ilinniagalinnik sulisoqalernissaq.

Kingullernut taasannut tunngatillugu tassa, ammasarfiit aalajangersimasut kissalu atuagaateqarfilerisutut pisinnaatitaaffiit inatsisitigut pisussaaffingortinneqarnissaat eqqarsaatigineqartariaqartut Inuit Ataqatigiinit isumaqarpugut.